



**Uani qinigaaffimmi Ilulissani GUX-imik pilersitsinissamut suliaqarnissamik Naalakkersuisut peqquneqarnissaannik Inatsisartunut aalajangiiffigisassatut siunnersuut.**

(Inatsisartunut ilaasortaq Nivi Olsen, Demokraatit)

(Siullermeerneqarnera)

Demokraatit Inatsisartuni ilaasortaataitanut Nivi Olsenimut qjanaq siunnersuummut pitsaasumut, tassalu Ilulissani GUX-imik pilersitsisoqassasoq.

Naalakkersuisut aamma qutsavigerusuppakka akissuteqarnerminni ersarissumik nalunaarutigimmassuk, Ilulissani GUX-eqarnissaa kissaatiginnikkitsik. Naalakkersuisut arlalinnik tunngavilersuuteqarpoq, aamma tamanna ajunngilaq, allanngortissanngilarali, isumaqarama, Naalakkersuisut kukkusut.

Tamanna inuusuttunut tamanut Ilulissani GUX-erusuttunut alianarpoq. Naalakkersuisut inuusuttunut oqarput, allatut ajornartumik nuuttariaqartut GUX-issagunik. Uffalu, Ilulissat immaqqa Kalaallit Nunaanni annertusiartornissaminut ilimanaateqarnerpaajusoq aalisarnermut periarfissat pitsaasut pissutigalugit, mittarfissarsuaq aammalu takornariaqarnerup qaffarujussuarsinnaaneranut periarfissaqarluartutut.

Allatut oqaatigalugu, Ilulissat illoqarfinni nuuffigissalluni soqutiginarnerpaanut ilaavoq, taamaakkaluartorli Naalakkersuisut pingaartinngilaat, inuusuttut Ilulissaniiginnarnissaat toqqisisimaffigisaminni, GUX-erniarlutik kissaatigissagaluarpassuk.

Naalakkersuisut isumaat, Ilulissani GUX-eqassanngitsoq kukkuneruvoq, neriuppungalu, maani Inatsisartuni amerlanerussuteqartut Naalakkersuisut isummaminnik allanngortitsinissaannik killissinnaassagaat.

Siunnersuut akuereqqullugu innersuunneqarpoq taakkunanngalu oqaaseqaatitalerlugu Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliami suliarisassanngorlugu innersuunneqarluni.